

大乘阿毗達磨雜集論述記卷第二

唐京兆大慈恩寺沙門窺基撰

△上來三頌讚禮所尊。敘標參綜。自下兩段。彰前歸歎。釋頌標因。於中有二。初文總彰前所歸歎。後段別釋頌所標因。初中有二。先總解能敬相。後別顯所歸歎。

今此頌中無倒稱讚。最勝功德。敬伸頂禮。

是則初文。此頌中者。發端標舉。簡持指斥。今於此頌。以無倒心求菩提。故稱揚讚歎。六義三寶。最勝功德。亦無倒心敬申頂禮。面揚曰稱。背譽爲讚。第

一名最。上妙曰勝。虔恭名敬。陳設曰申。稽首接足。名爲頂禮。是卽頌中心無倒。語稱揚身歸禮。三輪備。或此但說語讚身禮顯。二不邪。故皆無倒。可表彰。故不說意業。意業亦歸。亦有倒讚及倒歸禮。故說無倒。

以供養三寶及造此論經釋二師隨其所應。

下別顯所歸歎於中有二。初別顯後釋。因此則初也將糝兩文眞法供養故。先以行供養所尊所歸何者。謂三寶及二師隨有力德能爲護念所爲讚禮。皆讚禮之開演等言。是讚詞故。或前頌中於三

寶所讚而亦禮。於彼二師唯禮無讚。德有分滿。總言兼別名隨所應。所以者何。

下釋所因初徵後釋。此則徵詞。初解隨應釋此徵者。既有有力德隨皆讚禮。有何所以唯爾非餘。後解隨應釋此徵者。有何所以於三寶中讚而亦禮。於二師所唯禮無讚。或總徵言禮三寶等之所以者。何謂也。非謂別徵隨所應義。

此論所依及能起故。

自下釋也。初略後廣。此則略文。解初徵者。讚禮三

寶論所依故讚禮二師能起論故由此讚禮唯爾
非餘解後徵者三寶論依讚而亦禮二師能起但
禮無讚或總釋此所歸禮因非爲別釋隨所應義
佛薄伽梵是契經等一切教法平等所依

下廣釋前依起二義先釋所依佛陀覺者義如常
釋薄伽梵者能破四魔具六種義魔謂煩惱蘊死
及天六義者一自在二熾盛三端嚴四名稱五吉
祥六尊貴此等廣如佛地論說何故此中雙標兩
號不一非餘顯悟諸法舉佛陀名彰德可依標薄
伽梵二名俱勝不一非餘其契經等十二分教無

一不依世尊方有故佛與教爲平等依或由佛證
大定正智後智大悲方能起說三身與法皆爲等
依法是佛師佛應依法如何今說佛爲法依
無師自悟諸法實性一切教起所依處故

釋依所由最後之身證由自悟名曰無師卽簡所
餘依他悟道實性謂理由證此故後方說教彼教
旣由佛方顯說是故說佛與法爲依此非師資據
顯說故又此談教理是師故契經等教旣由理有
理則是果能證則行論皆依彼故說佛法俱爲論
依

從此無閒。聖弟子眾依法隨學。

顯次相依。佛證法已。卽爲弟子方便顯說。名爲無聞聖隨。修學名法爲依。諸聖弟子結集流布。由是展轉論方得起。故說僧寶爲論所依。

法爲依者。法界所流故。

釋說僧寶依法所由。謂教從彼清淨法界次第展轉平等所流。依教修行。後成證果。或由法界流出。正法本末俱勝。故聖弟子皆說依法。前隨所應。若依初釋。三寶於論能爲所依。故唯讚禮。非所餘類。若依後釋。三寶爲依。有力有德。故禮亦讚。或上總

釋三寶爲依。皆可讚禮。佛具四緣。性調善等。如前已說其所說法及聖弟子。故皆可歸。

以上總明論所依義。下述起論經釋二師。

經釋二師亦契如來所說正法一分。無倒聞思修行爲依止。故隨而造論。

世尊所說正法甚多。非唯餘聖聞能隨學。二師亦解彼之一分。亦言亦僧所餘聖等契者。證也。一分顯餘上位之法。猶未證了。未契解故。或但解此所釋經故。於所契解。無倒聽聞。思惟修行。滿足。由此三慧爲所依止。隨所聞等而造此論。此意卽彰依

釋而說故知此論定契正理若依初釋隨其所應此論既由二師方起故別讚禮不讚禮餘依後釋者二師但解起此論教非勝依止唯禮無讚或此總說由彼二師契如來所說一分三慧無倒爲所依止而起此論故恭讚之非是別釋隨所應義雖有三解初後順文三慧門義如別章說此以總文彰前歸歎而不指示參糅所以

次下別釋頌所標因此中有二初別釋前六義三寶後別解釋序起所因初中有二初總指前佛六義頌逐難釋故後別散牒隨文指釋隨標釋故

初二頌顯示如來應正等覺勝德六義所謂自性因果業相應差別義

此卽初也別總讚禮合有二頌此中並標故言初二四句爲頌由此定然下別釋中但於六義別總讚禮不過六故顯示何別顯說指示文義名體有差別故如來等者舉六義尊菩薩地說言無虛妄故名如來語如其義已來成佛爲如來故涅槃經云如過去佛說契經等從波羅蜜三十七品十一空等來至涅槃故名爲如來此意說言如諸佛等而說妙法從彼修萬行來至涅槃故言不虛是如

來義。又言不虛常行諦語來至佛位。故名如來。成唯識言。應已害賊。應不受生。應受供養。是故名應。涅槃亦言。應害世間。應離煩惱。應受天人種種供養。此等並通三乘。應釋佛。應有異。應害二障。應無二死。應受世間財寶供養。瑜伽論說。已得應得。應爲福田。應爲供養。是故名應。瑜伽初一。則此初二。瑜伽後二。則此後一。若說供言。便無餘義。瑜伽又言。如其勝義覺諸法。故名正等覺。此釋但覺勝義。爲名涅槃。經言。正者不顛倒。徧知者於四顛倒無不通達。此經亦但說觀諦理得徧知名。如實義者。

於一切境外道邪知。今知名正。二乘分達。今達二我名等。等謂平等菩薩。知未滿。亦未名等。知今總簡持名正等覺。餘之七名。如瑜伽論第三十八第八十三涅槃十七及第十八。大般若經成實論佛性論廣說。既有十號。何故舉三。此顯斷恩及智德。故異門分說。如來總名。包餘九號。應是其德。正等覺者。是不共德。此舉總別。其不共德徧。故非餘。由此諸經。但言多陀阿伽度等勝德六義者。佛本體名自性。修學證相名因。已證滿相名果。起作用相名業。與功德俱名相應。性體用異名差別。佛地論

等皆俱分別。

下別散牒隨文指釋。於中有二。初牒六義屬文散釋。當知以下屬釋法僧別。亦通歸讚。初文有六。釋六義故。一一文中各各有二。初牒頌文以六義屬。後方總釋頌義之意。

諸會真淨究竟理者。顯自性義。謂諸佛法身以一切種轉依真如爲體性故。

此中諸會至自性義。此卽初牒頌以六義屬。謂諸佛下總釋頌義。下皆準知。更不復釋。一切種者。謂諸有漏種類差別。或卽一切二障種子。轉此有漏

麤重所依。得非麤重真如所依。此論下說轉依有三。一心二道三者麤重。心轉依者。謂法性心永離客塵。故名爲轉。麤重轉依。謂本識內煩惱隨眠。皆永遠離。由因滅。故果亦隨無。又下自釋自性身言。以一切障轉依真如爲法身體故。此所言一切種者。因諸有漏轉此麤重所得心依。則是諸佛共有自體名自性義。眾德依止。亦名法身。故佛法身以此所得轉依爲性。又一切種者。卽諸有爲能依止法。類別多。故名一切種。此所依止轉依真如是自性體。自性難知。舉能依止以顯所依。令易解。故又

諸佛法身解諸會義種轉依解淨義一切轉依解
究竟義真如顯真義體性顯理義隨其所應別釋
前頌其轉依義後當廣釋。

超聖行海昇彼岸者顯因義謂佛菩提從一切種極
喜等十地聖行無量無數大劫圓滿修習因所生故
菩提有二一智二斷此智菩提從因生故一切種
者十地聖行一乘三乘自一乘中種類眾多由此
名海此順梵本故卽如是依此文句應言從極喜
等十地一切種聖行劫謂時分若依大劫阿僧企
耶因位經三數日月等無量阿僧祇大劫方滿阿

僧祇卽無數或無量者卽是無數無數卽是阿僧
祇耶要三阿僧祇大劫修行因便方滿謂佛菩提
經無數劫修於十地一切種聖行因圓滿方始得
生此顯時長所修行廣圓滿修習果方生故若不
圓修果必不生顯果所從故名因義又佛菩提解
彼岸義一切種至無數劫解聖行海時長顯廣行
多彰深因所生言解超昇義亦隨所應別屬前頌
又一切種者所經眾位無位不經舉十地者別顯
勝位一切種通一切無量無數劫聖行解海義劫
有三無數非無量故大劫是時亦得同上解十地

名義下文自釋。

證得一切法自在者顯果義。

此牒頌文以六義別屬遂利於因故名爲果。

謂永斷一切煩惱障所知障及彼餘習。

總釋頌義將釋證得先顯所因謂由斷障方證得
故障涅槃惑名煩惱障覆所知境令智不生名所
知障體卽種現習者卽是因障所有無堪任性故
瑜伽論第五十說佛由斷此名斷習氣菩薩地說
斷此名三住斷簡異二乘故故別稱習成唯識中
已廣分別二障體義如佛地論第七卷成唯識第

九卷別章等說。

證得無邊希有功德無上三菩提果於一切法自在
轉故。

正釋頌文證得等義三菩提者所證得體無邊希
有無上三言皆讚歎詞無邊者廣多義希有者難
遇義無上者最勝義三菩提者正覺義由斷障習
便證廣多難遇功德最勝覺果此義卽顯證得一
切功德法自在起或由斷除障習盡故證得希有
無上菩提於諸境中正後二智成十自在自在而
起此顯於境得自在故如頌中釋功德無量但說

菩提以智爲主覺最勝故增減字義別配頌文準釋可解故不別屬。

善權化導不思議者顯業義。

此以六義屬諸佛化用故稱爲業。

謂以超非一切智境神通記說教誡變現等無量調伏方便。

此釋善權不思議義除佛以外一切皆名非一切智二乘等起此三輪等是彼所知名爲彼境佛三輪等化用廣深非彼所知名非彼境由非彼境稱不思議非彼所知及言議故十輪經說佛三勝輪

不共一切故不思議佛能應物現三輪等巧妙無方立善權稱此神通變者謂神境神變記心者謂記說神變教誡者謂教誡神變菩薩地言此三神變卽是三通謂神境智通知心差別通漏盡智通六通之中具當分別三輪略以四門分別一出體二釋名三廢立四辨相一出體者依瑜伽論六十九說前五神通異生有學起者有漏道勢劣故無學起者皆是無漏道勢強故此中但說如來所起唯是無漏漏盡智通卽彼論說盡及無生二智爲性唯是無漏此言但說緣漏盡故或亦通說漏盡

身成他心智等並無漏故前五神通漏盡相續所成就故皆名無漏非無學身不成無漏由此卽顯此中三輪唯是無漏三皆世間由漏盡輪教誡他故此三唯依諸靜慮地意識相應後得智中智慧爲性卽彼又說神通等一切靜慮以爲依止皆能引故無色雖亦有漏盡智諸菩薩等隨以彼心了一切法亦能依彼變諸境等如佛邊立等作用狹故而不名通色界心廣除未至地可有諸通定慧均故瑜伽旣說三輪卽通故同於通非在餘地二釋名者智具威德修所成果作用難測名之爲神

轉易不定稱之爲變變者是境神者是智變之神能變也神之變所變也皆依主釋神卽變變屬能變持業釋此中但取初及第三釋輪者摧伏羲摧伏他身邪見等故神變卽輪持業釋也心謂他心種種差別記者別也識也別識彼心名日記心雖亦能記他之心所心是主故但說記心心之記故亦依主釋記心卽輪亦持業釋教謂教示令其善生誠謂誠勗令其惡滅教卽是誠教誠卽輪皆持業釋三廢立者聲聞地說由現神變令他於己生尊重心能屬耳聽由記說故記別其心行相差別

爲說妙法。由教誡故。如其根行。隨所悟入。能正教誡。或未發心。爲作神變。不修正行。記別其心。未有證獲。而爲教誡。又身意語。如其次第。第三業化故。故此三輪。非增非減。四辨相者。菩薩地說。初神變相。略有二種。一能變。二能化。能轉所餘。有自性物。令成餘物。名爲能變。隨欲化爲。曾未有事故。名能化。能變者。謂十八變。一振動。二熾然。三流布。四示現。五轉變。六往來。七卷八舒。九眾像入身。十同類往趣。十一顯。十二隱。十三所作自在。十四制他神通。十五能施辯才。十六能施憶念。十七能施安樂。十

八放大光明。能化者。此有三種。謂化爲身。或化爲境。或化爲語。化爲身者。化自他身。似他自身。或一或多。如是等類。化爲境者。化似末尼。飲食資具。諸如是等。化爲語者。妙音麤音。繫屬自他。如是一切。次記心相差別有五。一記有纏。有隨眠。離纏離隨眠心。二記有染。邪願無染。正願心。三記欲色無色。五趣等心。四以一記。一以一記。多心。五諸佛菩薩。記諸有情。諸根勝劣。種種勝解。種種界行。隨應安處。涅槃行中。教誡相者。或說有五。所謂遮止。開許。諫誨。呵擯。慶慰。或卽此中。示導等五。此三輪義廣。

如十地論第四卷十輪第六卷瑜伽第二十五第二十七別章等說。示導者舊經所說示教利喜也。或說五句謂令離欲。示現教導讚勵慶喜顯揚論第十二說。訶毀諸行令離愛染。名令離欲。示現四種真實道理名爲示現。已得信解令正受行名爲教導。若彼退屈策發令進名爲讚勵。彼隨法行讚令忻悅名爲慶喜。彼論又說有令離欲而非示現說惡令厭不教作善有唯示現不令離欲。示德令修不遮彼過俱句可知。未學令學名教導。未進令進名讚勵。慶喜有五廣如彼說。五種皆是教誡之

相此中唯舉修善四門。不說令離欲。或此但說示導二種等。彼餘三及佛地經十作業等一切皆是此善權攝。無量調伏方便者顯揚第三及第八說無量有五。一有情界無量謂一足等。或地獄等六十四類。二世界無量謂十方界。三法界無量謂善不善等。四所調伏界無量謂三乘性等五十五類。前有情界通有無性。此唯有性。故二差別。五調伏方便界無量謂隨所宜。或現神變。或現記說。或現教誡。一切善巧調伏之法。菩薩悲慧本爲有情有情必依住處受化。彼由諸法成其染淨。故觀幾類

甚至涅槃最後乃施方便善巧。故五無量不減不增。此等義門。廣如別章及彼論說。調謂和御。伏謂制攝。方便卽是善巧之義。由此卽以三種神變調和控御。制伏攝受。名爲善權。卽無量中調伏方便界無量也。三輪示導。出善權體。指此類等有無數量。調伏方便。非調伏等別配三輪。導引可化有情。令心界清淨故。

釋化導義。可化有情。簡非無性。五無量中所調伏界之無量也。以彼能調伏所調伏。心界卽是法性。眞如界者。性義心本性故。或依他心自體名界。以

三輪等如是無量調伏方便。導引於彼。可化有情。令眞心界離客障染。斷依他心得清淨故。

無量希有勝功德者。顯相應義。謂超尋思數量無邊種種難行苦行所生無上大悲力無畏等功德法寶相應故。

超尋思者。非四尋思。此四唯在見道前位。彼位修因非唯所超。由此超者。隨應超。但非彼智境皆是。此超義。數量者。以行無邊過算數故。超過此二。故曰無邊。因行非一。稱爲種種。捨頭目等。不易名難。此行逼迫。故言苦行。顯因無量希有。故所生果更

無量希有。謂由因此無邊勝行。故生大悲力無畏等。亦復無邊。名有與如是等法寶相應。言相應者。謂總假者與別實德俱。或成就義總成別德故。或果順正。因性常俱。有更相順義。此中但說受用相應。如前已解。言所生故。或此舉所生。由證法身能起化用。三皆具足。文唯舉報。此中且舉二種無邊。窮空盡際。略而不說。大悲十力。四無畏等。第十四卷下文當釋。

自他並利所依止者。顯差別義。謂如來受用變化身。如其次第。自他並利所依故。

此中有二。初總屬頌。下別解釋。此初文也。次配可知。

所依者。身義體義無差別也。

下別解釋。文有其三。初解所依次解三利。後結差別。此解所依。成唯識說。體依聚義。總說名身。故所依言體身無別。

自他並利所依者。就勝而說。

此解三利。初總釋意。後別釋之。此總釋意。所說三利。就勝而說。非理定爾。至下當知。

謂受用身自利最勝處。大會中能受第一。廣大甚深。

法聖財故。

下別解釋就勝所因。會有二種。自受用身居自法會。居他會者。他受用身。皆能領受最勝第一廣大甚深法聖財故。唯自利攝。瑜伽等說聖財有七。謂信戒慚愧聞捨慧。彼據用勝。且言七種。今說功德。聖者資什皆名聖財。處大會中並生樂故。據實此身亦實他利。受樂增勝。不同化身多起通化。從自受用。不說利他。佛地論說通二利故。由此論有就勝說言。受法樂增名爲受用。又處大會謂自廣大法性之會。故唯自利身。

變化身者。他利最勝。徧於十方一切世界能起無間。猶工巧業等諸變化事。建立有情所應作故。

猶者譬如義。工巧業者謂幻術事。佛變化身隨形利物。無而忽有。幻術不殊。幻事既由工巧智起。故舉彼喻以顯化身。又工巧業能化眾緣像。化身亦爾。故舉爲喻。等彼幻術論說等言。佛地論說身三化中爲摧諸伎傲慢眾生。故如工巧。此身頓於一切世界能爲無間相續現起。沒已復生。建立應化。無暫休息。故唯他利。形隨樂現。名變化身。自性身者。謂諸善逝共有法身。

菩薩地說。上昇最極。永不退還。故名善逝。初句是善後。是逝義。已到名逝。故不退還。或上昇者。亦是逝故。唯識等說。諸受用變化。各別因感。各別自性。實有差別。但無別執。同處相似。利樂意樂事業平等。說無差別。唯自性身。諸佛共有。故言善逝。共有法身。

最極微細。一切障轉。依眞如爲體故。

唯障佛果。故極微細。種習非一名。一切障。卽彼法身。轉捨一切二障。種習麤重所依。以所轉得無麤重。依眞如爲體故。餘十地所得眞理。不名法身。一

切障習猶未盡故。

於自他利並爲最勝。由證此身得餘身故。

自體難知。二利之相舉。由得此有餘二身。二利差別顯通。二利佛地論說。此自性身寂滅安樂。正屬自利。爲增上緣。通益眾生。故屬利他。又與二身俱利。依故。二利所攝。同彼復釋。約用顯故。復此中就勝說故。

此三佛身。是差別義。

子文第三曲結差別。三身略以三門分別。一出體。二釋名。三廢立。一出體者。初自性身。以諸如來眞

淨法界受用變化所依爲體。具足無邊眞常功德。佛地論說體常無變。成唯識言諸法實性。或是諸佛共有自體名自性身。大功德法所依止。故亦名法身。勝鬘經言不離煩惱藏名如來藏。離煩惱時名法身故。雖亦有說鏡智爲體。然非正義。故不敘之。次受用有二類別。一自受用。三無數劫修集資糧所起無邊眞實功德至極圓淨常徧色身。卽四智品一切實德以爲體性。自受法樂名受用身。雖亦有說中二智品爲此身體。然非正義。故此不說。二他受用。由平等智於純淨土爲大菩薩所示現。

身以爲體性。令他受法樂。亦名受用身。據理而說。四智心品爲大菩薩所現佛身爲他受用。說法斷疑現自在者觀察智故。平等所依本質身者鏡智境故。現大神通成事智故。又佛四智境用徧故。然平等智於現此身作用最強。擊圓鏡智現身平等。故論偏說。其理定然。不爾此身應無本質。斷疑說法現通起化。後變化身由成事智於淨穢土爲未登地一切有情隨彼所宜所現形類以爲體性。爲益有情示現種種變化事故。名變化身。理實此身四智所現化境爲體。然此相麤順成事智故。論偏

說此論報化不彰於智。又理定然。此解爲勝。或復此身及他受用。各一智現。足利有情。不假所餘。故論不說二釋名者。法身一名。唯依主釋。法之身故。其自性身。或持業釋。自性卽身故。或有財釋。以自性爲身故。其受用身。唯持業釋。若變化身。亦有二種。由能變化者。謂成事智等。以所變化爲身名。變化身。有財釋名。若所變化卽身。持業釋也。三廢立者。所證能證。眞俗理事。本有修生性。相差別。立初二身。自利利他。自體作用。能變所變。慧悲所增大。小差別。別立化身。二對義門。各有無量。不可說一。

雖多義別。種類唯爾。不可說多。又性相用。如世間身。有體形。能故立三身。非增非減。所餘義門。如勝鬘經楞伽經解深密經涅槃法華攝大乘瑜伽論讚佛論般若論成唯識佛地論三身論別章等說。上牒六義。屬文散釋。下釋法僧亦通歸讚。當知此中亦讚法僧功德。

初總後別。此總屬文。此中意說。前以六義讚佛之內。通讚法僧。顯初三寶。旣通攝讚。後歸禮中。故總歸禮。何者。法僧言亦通讚。由斯於後三寶通歸法寶者。自性因果等義。所攝故。

此顯所讚法寶之體。自性卽理。因是行果。如自名業。義通教。相應差別。卽上可知。故言等義法寶所攝。由此六義亦通讚法。離此更無一乘法故。僧寶者。隨此修學所生故。

顯所讚中僧寶之相。卽是所超聖行海。因故不說佛入僧中所收。又次前章說佛薄伽梵教法所依。俱依法學。故依此法修生曰僧。所學之法。旣在讚中。能學之僧亦已通讚。離此更無一乘僧故。雖前眞理卽同體。僧恐讚不周。故舉別體。或顯一乘法離佛體無學。一乘道僧離佛體有。故舉讚此隨學。

之僧。此讚非凡。前言聖故。一乘三寶旣通讚。故歸禮中並通歸禮。由此卽顯所禮所讚該同別相。不徧二乘。又釋前讚。一乘理智可稱。非餘乘故。後於歸禮總禮三乘有力等心。皆可歸。故前後影顯。故不相違。由此反彰頌言如是貫通三寶。指讚歸故。三寶略以三門分別。一出體。二釋名。三廢立。一出體者。初佛寶體。卽前三身眞非眞佛。皆此攝。故法寶有四。教法寶者。謂善無漏聲名句文。如前廣說。雖有漏聲等。亦教法寶性菩薩聲等。並有漏故。然非此中教法寶體。此中但說眞教法故。理法寶者。

謂因四諦二空所顯真如爲性。行法寶者謂通三乘諸無漏行。雖有漏行亦行法寶。此行非真。故今不說果法寶者。謂有無餘二涅槃界及菩提智無住涅槃以爲自體。此中通說三乘所有教理行果爲法寶性。眞法非眞並通說故。僧寶者謂聖眾一切無漏有爲無爲成眾聖法。由此鱗角獨覺三根皆僧寶攝。僧種類故許彼眾多同時出故。菩薩二根亦復如是。有漏身器爲無漏依。供養及損故生罪福。然有漏身非僧寶體。此中通說三乘聖眾眞僧非眞並皆說故。勝鬘經說僧者卽是三乘眾故。

就此復有一乘二乘。一乘佛者卽初二身。法寶亦四教謂詮辨一乘教法。理謂二空所顯眞理。行謂有爲無漏萬行。果謂佛位菩提涅槃。僧寶者謂十地菩薩等所有諸無漏法。此皆通說有爲無爲直往回心一乘無漏爲三寶體。二乘者佛卽變化身亦爲二乘現化身。故不爲十地現此身故。旣詮彼教名彼教法爲彼現身。故彼佛攝法亦有四教。謂詮彼二乘教法。理謂四諦理等所顯眞如。行謂彼所修無漏智等。果謂彼所證菩提涅槃。僧謂二乘住果住向諸無漏法。於一乘中復有二種。謂同體

別體同體者。謂真如覺性故。覺依故名佛寶。解深密說菩提及斷皆名菩提故。諸處說爲自性身故。能持自相卽名爲法。教行果三所依止故。法寶所攝。理無乖諍。復由證此成菩薩等。亦僧寶收。此等證文如前已說。別相三寶亦如次前一乘二乘三寶別故。前來且說真實三寶。住持三寶。相易可知。恐厭煩文。故略應止。二釋名者可貴可珍。稱之爲寶。總名帶數。別名持業。旣易可知。由此不述。三廢立者。何故三寶。非減非增。略有四義。一僧祇律云。爲翻外道邪三寶故。二寶性論云。依三義故。一調

御師。二彼師法。三彼師資。三寶性論又說爲菩薩。上根說有佛寶。願作佛故。爲獨覺中根說有法寶。求自然智達緣起故。爲聲聞下根說有僧寶。求從他聞作弟子故。四處處皆說佛如良醫。法如妙藥。僧如看者。故此三寶不減不增。所餘義門。如別章說。此中三寶種類有多。頌中所明讚歸何者。一乘非餘。六義卽法。僧隨學故。餘無力故。或通讚禮三乘三寶。彼離此等無讚禮故。勝鬘經說。波羅提木叉毗尼出家受具足等爲大乘故。彼二乘者入於一乘。又彼所學菩薩皆修。故彼法僧今皆讚禮。又

無朋黨等讚禮故。此但讚禮別相非餘說。僧隨法修學生故。或通讚禮同相別相。同相易知。故論不說。又唯禮讚真實三寶。住持無力無救助故。或通讚禮真實住持。住持相易。故論不說。並皆有力能救助故。三寶門義。如前頌中歸禮所指諸經論說。上別釋前六義三寶。下別解釋敘起所因。庶令學者無諸怖畏。方造論端。建茲體性。

此文解釋序起所因。庶望也。端序也。建立也。茲此也。此意說言我今冀望令諸學者於此論中無諸怖畏。方造論序。讚禮所尊。憑力請加立三寶性。又

於論端歸讚三寶。顯體尊高超諸聖眾。令後學者心生欣慰。無怖畏故。建此論序。上來安慧讚揚三寶。歸禮所尊。敘參糅意。卽是第一讚揚歸敘分。下述兩文正申參糅。卽是第二集述本文分。第二分中大文有二。初以一頌總標一部分品。後隨前標分品次第別釋。

本事與決擇。是各有四種。三法攝應成諦法。得論議。此頌總標一部分品。頌文既少。寄品以明。非此頌文。唯三法義。此論總有二分八品。二分者何。初本事分。後決擇分。八品者何。是二分中各有四種本

事四者。一三法。二攝。三相應。四成就。決擇四者。一諦。二法。三得。四論議。此有何因。總爲二分。本事分中。略廣分別諸法體事。決擇分中。略廣決擇深隱要義。又一切法略有二種。一自性。二差別。初宗明自性。後宗明差別。又陳法義不過二種。一所成。二能成。前宗明所成。後宗明能成。又教所明。總有三種。謂境。行。果。初宗明境。後明行。果。果依行。成。行能生。果。二極相順。合一明之。又此雖釋阿毗達磨經。然依瑜伽集諸要義。謂初本事分集。彼論中本地文義。後決擇分集。彼論中決擇文義。彼攝釋分解。

經儀則。彼異門分釋經名義。彼攝事分攝三藏事。彼初二分無義不釋。集彼文義。攝法已周。後三非要隨二演之。故不可別集。由如是等種種所因。故說二分。非增非減。復以何義。各成四品。菩薩藏經第十七卷。辨中邊論。說十善巧。一蘊。二界。三處。四緣起。五處非處。六根。七世。八諦。九乘。十有爲。無爲善巧。此十皆是菩薩所觀。依略廣中。辨釋諸法。三攝已盡。更不假餘。又是三乘方便。通觀。所以偏說。令彼觀故。又由此論云。欲令學者得二利益。初說蘊等。故論初辨三法品。雖辨三法。諸門體義。然未

知彼體義寬狹。須彰寬狹。次明攝品。寬狹之義。雖已了知。性相順違。仍未明達。為知違順。次辨相應。所不相應。則是違故。雖復了知順違。體用諸法。得失。尙未解了。為知得失。次明成就。所不成就。則是失故。由是等義。本事分中。分為四品。此前四品。並是所觀。依境起修。須觀諦理。故初決擇。即明諦品。雖知所詮。總觀諦行。能詮及妙行。猶未了知。為知及起修。次明法品。此前二品。依境起行。行必有果。次明得品。雖已證獲。未明慧解。顯正摧邪。利他無畏。為成彼事故。次明論議品。體品既四。義品亦然。

不減不增。唯定成八。此中諸品。各從勝名。彼諸品中有餘法故。

上來一頌。總標一部二分八品。以下隨前所標。分品次第別釋。初分四品。分之為二。三法體也。餘三義也。又分既有二品。各成四隨標所明。更不科釋。幾何因取。相建立。與次第義。喻廣分別。集總頌。應知。此上二頌。無著論本。

三法品中大文有四。初以九義辨釋三科。二以三性辨釋三科。三以相等四門辨釋三科。四以外等六義辨釋三科。至下當知。不煩預指。初九門義文。

復有三。初以頌標。次隨別釋。第五卷云。由此所說差別道理。餘無量門。可類觀察。後類指結。

此則初也。頌上三句。列九名。別下之一句。標集勸知。九門義者。一幾舉數列名門。二何因問答廢立門。三何取問答別名門。四何相問答體性門。五何建立問答差別門。六何次第問答前後門。七何義問答釋名門。八何喻問答譬況門。九何廣分別問答諸義門。上一何言貫通下。八幾卽是問。故何不通。何者。問辭。故或隨所應。喻中無問。問但通七。今且略指。隨應當知。

下釋前標九種門義。文勢有二。初覺師子假興問答。論端先辨三科所由。二隨九門一一別顯。就初有二。先問後答。

問。何故論端先辨蘊等。

此則問辭爲何義。故於論端首先辨三科。不彰餘法。

下答有三。初略次徵後廣別釋。

答欲令學者於幾何因等諸思擇處得善巧故。

此初略答。思謂思量。則止觀品。擇謂擇簡。則論議者。此二皆是能思擇也。處謂處所。卽所思擇九門。

是也。善謂勝妙，巧謂巧便。卽是方便。意言論首先辨三科。欲令思擇精勤修學者於幾何因等前九門義所思擇中獲得勝妙巧方便故。以智慧生長所以者何。

此徵所由。令於此等得其善巧之所以者何謂也。未究了故。

由此善巧能得二種稱讚利益。所謂作意稱讚利益。論議決擇稱讚利益。

下廣別釋。文復有二。初總後別。此卽總文。稱謂稱場面談其實讚謂讚歎背譽其美。言作意者卽是

止觀相應作意。各於彼境能持心住。或能數數警覺彼心作用勝故。止觀二品立作意名。論議決擇卽是其他議論諸法。此總義言。由此論初辨三科。法令止觀者於思擇處得勝方便。斷諸煩惱。自利滿足。旣自歡喜稱揚讚歎。他人亦復稱讚其美。若利他者談論法義於思擇處旣得善巧。自生喜讚。亦令他人斷諸煩惱讚揚美故。此二增長現後安樂名二利益。或稱讚者談此二種順理益物可稱。可讚言其勝益之甚。非說自他面背稱讚。

作意稱讚利益者。謂善順增長奢摩他毗鉢舍那故。

自下別釋上二利益先解自利。文復有二。此卽總牒別開二門。正釋利益。奢摩他者。此翻爲止。卽等引位。略有九種。謂內攝心令等住等。毗鉢舍那。此翻爲觀。謂簡擇法極簡擇等。略有四種。此等如下第十卷說。謂由九門辨三科法爲境界故。聞思修起。令彼止觀圓滿成就。境勝順心。或因順果故名善順增長止觀。止觀皆是所增長法。

善順增長奢摩他者。謂於如是諸思擇處。已作善巧得無疑故。

此釋止增先彰斷惑。由於三科起聞思慧。已得善巧。令疑惑等障定煩惱皆不得生。以疑爲初例。包一切。

隨其所樂於一境界。正觀現前。心易定故。

正明止增。由得聞思方便善巧無疑等故。隨其行者所樂之法。十善巧中。於一境界起聞思慧。無倒觀察起現在前。定易生故。

善順增長毗鉢舍那者。以無量門觀察一切所知境界。速令正慧究竟滿故。

此釋觀增。謂此論初總以九門別以無量門觀察一切所應知境。境順心故。速令學者無倒三慧究

竟成滿。或聞思因順修慧果觀眞現慧名正慧。故此二止觀通有無漏。世出世間唯定非散。凡聖皆得究竟。能得一切智果自利滿故。速令正慧究竟滿者。謂無漏慧。

論議決擇稱讚利益者。由於如是諸思擇處善通達。故成就一切問答自在於諸異論得無所畏。

此解利他。謂由於彼九門體義得無漏慧善通達。故便能成就問答自在於餘一切異談論中。或餘一切異論教中善能通達得無所畏。由此三科攝法盡故。九門廣釋體義同故。

大乘阿毗達磨雜集論述記卷第二

校勘

四左三行
不月行